

# Ze stoat now stil, de töw! (1967)

*Ze stoat now stil, de töw, de spinmesien'n bi'j 'n Baans, bi'j Jannink en Van Heek,  
Bi'j Scholten, Schuttersveld, Ter Koel, bi'j Bliedensteen, de Nijverheid, Van Dam,  
Bi'j Menko, Holland, Hardick, Seckel, Oosterveld, de Bato, Rigtersbleek.  
Wat ooit de trots van Eansche was, dat löp nich mear, lig lam.*

*'t Is lang eelen dat 't spil begon, oop Labbediek, in 'n oale schuur,  
Oop töw van hoalt, deur rappe haan, mär zonner stoom bedeend.  
Deur d'eeuwen hen wödd'n zo het brood deur 't volk verdeend,  
Veur eer, veur joonk en oald, en bloond en gries, slöt now het laatste uur.*

*Van Lochem breurs en Thomas Ainsworth en De Clercq, De Maer',  
An eer daankt 't volk van Eansch' en Twente welvaart, weark en brood.  
Dat now het volk gedoan krig oop 't febriek döt 't hert merakels zear,  
Waant met 't bedrief geet ok een stukske van ow eigen dood.*

*Wat is textiel veur 't volk van Eansche lang 'n broodheer wes,  
Wat is het weark de joare deur van vaar op zön en keendskeend oovergoan.  
Woanum geet now dat hele spil as of ,t mär niks is oop de fles  
En keump dat volk van weavers, spinners, vearvers, enzovoort, op stroat te stoan?*

*Het is de tied dee ni'jermoods de greanzen doaneg hef verleg  
Van wat in 't boetenlaand, mär ok van binnenoet, de tieden deur was greui'jd.  
De wissigheid van wat normaal leek en zo good beveul, dee is now weg,  
Het roer mos ummegoooid, mär 't is te laat: de bloom is oetbleui'jd.*

*Nog rept veur 't geestesoog de leu zik noa 't febriek en blös 'n stoom:  
I'j kriegt nog vief minuten volk, dan zette wi'j het spil in gang.  
Doar klikklakt kleumpkes rapper oaver stroat: veur boot bint z'alsoal bang,  
Wel fietst, den gef zikzölm nen extra zet: zo hölt de fluit het volk in toom.*

*Zo is 't de joare deur egoan, van vaar oop zön en dee zien keend,  
Van 's morns tot s'oams, of in de ploog, het hele leaven lang.  
Wat bint d'r vö! wee 'n heer noa zovöl joar 'n lintje hef verleend:  
Het klökske veur de pronk, en bleumkes veur de vrouw, en 't waandbord oop 't behang.*

*Het was nich aaltied pais en vree, nich met de baas en geels nich met 'n heer,  
Wat warr'n de köp vaak naa vergreld, wat is d'r vaak deur 't volk ok staakt.  
Wat is het loon, het uurtarief, vaak oorzaak wes, wat leut het volk ok vaak 'n veer,  
Wat hebt d'r ok 'n hoop noa 't zin e'had, hebt toch de meest'n d'r wat goods van maakt.*

*Nich langer vormt de flatcard lap of wikkel bi'j het spinnen tot een lont,  
Nich langer schöt bi'j 't weav'n de spool de inslag deur de sprong.  
En ok geet d'r gin stof mear in de kuup veur 't vearven van gediën'n of schortenbont,  
Dee tied he'w had: de keender piept nich mear zo as het oalderpaar in vrogger tied'n zong.*

*De töw, de spinmesien'n stoat stil, de beuk goat too, het lech geet oet, de poort geet dicht,  
Now is het wochen enkel nog oop 't GAB, oop ,goodgoan', veiling en oop sloop.  
Mär kop oop, leu, d'r is toch mear as enkel mar textiel bi'j oons te koop:  
Oons Eansche gef het weark en ok zikzölm de joarn dee komt 'n ni'j gezicht!*